

觀堂集林

海甯王忠愍公

遺書初集

丁卯秋季校印

丁卯五月王忠愍公效止水之節予上其事於 行朝 天子

驚悼旣已褒揚其大節海內外人士亦莫不惜其學術競爲文字以志哀挽公同學同門諸君子復剏立觀堂遺書刊行會以刊行公之遺書請予總理董之役予以憂患待盡之身恐不克竟其業欲謝不敏而義不可辭乃以數月之力將公遺書已刊未刊者釐定爲四集次第付梓冬十二月初集告竣乃序其端曰公平生學術之遞遷予旣於觀堂集林序及公傳中詳言之矣而於公觀世之識未之及也乃摘其論古今政學疏爲公別傳而尙有未盡今更舉數事方公遊學日本時革命之說大昌予移書致公謂留學諸生多後起之秀其趨向關係於國家前途者甚大曷有以匡救之公答書言諸生驚於血氣結黨奔走如燎方揚不可遏止料其將來賢者以殞其身不肖者以使其私萬一果發難國是不可問矣時公同學閩中薩生均坡與公同留學東京亦入黨籍公以書見告且謂薩固賢者然性高明而少沈潛彼旣入籍見所爲必非之惟背之則危身從之則違心邇見其居恆鬱鬱恐以此天天年也已而薩生果夭如公言

予在海東公先歸國英法學者斯坦因沙畹諸博士邀予遊歐洲列邦予請公同往將治任矣而巴爾幹戰事起予告公行期將待戰後公復書言歐洲近歲科學已造其極人欲亦與之競進此次戰事實爲西政爆裂之時意歲月必久長公此行或不果邪後數月予返滬江沈乙庵尙書觴予於海日樓語及歐戰予以公語對尙書曰然此戰後歐洲必且有大變戰勝之國或將益擴大其國家主意意謂德且勝也予曰否此戰將爲國家主意及社會主義激爭之結果戰後恐無勝利國或暴民專制將覆國家主義而代之或且波及中國尙書意不謂然公獨諍之已而俄國果覆亡公以禍將及我與北方某耆宿書言觀中國近狀恐以共和始而以共產終某公漫不審乃至今日而其言竟驗矣惟公有過人之識故其爲學亦理解洞明世人徒驚公之學而不知公之達識固未足以知公而重公節行不知公乃知仁兼盡亦知公有未盡也予故揭公佚事以告當世至公學術之鴻博浩瀚世人皆能知之固不待予之喋喋矣丁卯仲冬上虞羅振玉書

海甯王忠愍公遺書初集目錄

觀堂集林二十四卷

增訂本

觀堂別集一卷補遺一卷後編一卷

觀堂外集四卷

爾雅草木蟲魚鳥獸釋例一卷

兩周金石文韻讀一卷

觀堂古金文考釋五種五卷

史籀篇疏證一卷

校松江本急就篇一卷

附校補

唐韻佚文一卷

唐寫本唐韻校記二卷

都十種四十三卷

初集目錄

附錄目錄

附錄十 附錄十三 卷

附錄本 附錄二 卷

附錄文 一 卷

附錄本 附錄一 卷

附錄本 附錄一 卷

附錄本 附錄一 卷

附錄金 附錄一 卷

附錄本 附錄一 卷

附錄本 附錄一 卷

附錄本 附錄一 卷

附錄本 附錄一 卷

附錄王忠憲公讀書附錄目錄

海甯王忠愍公傳

羅振玉

公諱國維字靜安亦字伯隅號觀堂亦曰永觀浙江海甯州人
先世籍開封當北宋時其遠祖曰珪曰珪曰光祖曰稟曰荀四世均
以武功顯而三世死國難事蹟具宋史高宗時子孫扈蹕南渡
遂家海甯其後嗣隆替載於家牒此不備書曾祖公祖公並潛
德不耀考迺譽值洪楊之亂棄儒而賈公生而歧嶷讀書通敏
異常兒年未冠文名噪於鄉里尋入州學以不喜帖括之學再
應鄉舉不中程乃益肆力於詩古文於時值中日戰役後和議
告成國威稍替海內士夫爭抵掌言天下事謀變法自強光緒
丙申錢唐汪穰卿舍人^{康年}勑設時務報於上海以文章鼓吹天
下人心爲之振動異日亂階遂兆於此然在首事者初未知禍
之烈且至是也公時方冠思有以自試且爲菽水謀乃襁被至
滬江顧無所遇適同學某孝廉爲舍人司書記以事返鄉里遣
公爲之代明年予與吳縣蔣伯斧學部^補結學農社於上海移
譯東西各國農學書報以乏譯才遂以戊戌夏立東文學社造
就之聘日本藤田博士^{豐八}爲教授公來受學時予尙未知公乃

於其同舍生扇頭讀公詠史絕句知爲偉器遂拔之儔類之中
爲贍其家俾力學無內顧憂歲庚子旣畢業予適主武昌農學
校延公任譯授明年秋公東渡留學日本物理學校期年以脚
氣歸主予家病愈乃薦公於南通師範學校主講哲學心理
理論諸學甲辰秋予主江蘇師範學校公乃移講席於蘇州凡三
年丙午春予奉學部奏調明年薦公學行於蒙古榮文恪公慶
命在學部總務司行走歷充圖書館編譯名詞館協修及辛亥
冬國變作予挂冠神武避地東渡公攜家相從寓日本京都是
時予交公十四年矣初公治古文辭自以所學根柢未深讀江
子屏國朝漢學師承記欲於此求修學塗徑予謂江氏說多偏
駁國朝學術實導源於顧亭林處士厥後作者輩出而造詣
最精者爲戴氏震程氏易錢氏大昕汪氏中段氏玉裁及高郵二王
因以諸家書贈之公雖加流覽然方治東西洋學術未遑專力
於此課餘復從藤田博士治歐文及西洋哲學文學美術尤喜
韓圖叔本華尼采諸家之說發揮其旨趣爲靜安文集在吳刻
所爲詩詞在都門攻治戲曲著書甚多並爲藝林所推重至是

予乃勸公專研國學而先於小學訓詁植其基並與論學術得失謂尼山之學在信古今人則信今而疑古 國朝學者疑古文尙書疑尙書孔注疑家語所疑固未嘗不當及大名崔氏著考信錄則多疑所不必疑至於晚近變本加厲至謂諸經皆出僞造至歐西之學其立論多似周秦諸子若尼采諸家學說賤仁義薄謙遜非節制欲泐新文化以代舊文化則流弊滋多方今世論益歧三千年之教澤不絕如綫非矯枉不能反經士生今日萬事無可爲欲拯此橫流舍反經信古末由也公年方壯予亦未至衰暮守先待後期與子共勉之公聞而慍然自懟以前所學未醇乃取行篋靜安文集百餘冊悉摧燒之欲北面稱弟子予以東原之於茂堂者謝之其遷善徙義之勇如此公居海東旣盡棄所學乃寢饋于往歲予所贈諸家之書予復盡出大雲書庫藏書五十萬卷古器物銘識拓本數千通古彝器及他古器物千餘品恣公搜討復與海內外學者移書論學國內則沈乙庵尙書柯蓼園學士歐洲則沙畹及伯希和博士海東則內藤湖南狩野子溫藤田劍峯諸博士及東西兩京大學諸

教授每著一書必就予商體例衡得失如是者數年所造乃益深且醇公先予三年返國予割藏書十之一贈之送之神戶執公手曰以君進德之勇異日以亭林相期矣公既返國爲歐人某主持學報並徧觀烏程蔣氏藏書爲編書目並取平生造述擷其精粹爲觀堂集林二十卷三十五以前所作棄之如土直卽所爲詩詞亦刪薙不存一字蓋公居東後爲學之旨與前此夔殊也壬戌冬蒙古升吉甫相國奏請選海內耆碩供奉南書房以益聖學首以公薦得旨俞允明年夏公入都就職奉旨賞食五品俸賜紫禁城騎馬命檢昭陽殿書籍公以韋布驟爲近臣感恩遇再上封事得旨褒許甲子秋予繼入南齋奉命與公檢定內府所藏古彝器乃十月值宮門之變公援主辱臣死之義欲自沈神武門御河者再皆不果及車駕幸日使館明年春幸天津公奉命就清華學校研究院掌教以國學授諸生然津京間戰禍頻仍公日憂行朝頻至天津欲有所陳請語訥輒苦不達今年夏南勢北漸危且益甚公欲言不可欲默不忍乃卒以五月三日自沈頤

和園之昆明湖以死家人於衣帶中得遺墨自明死志曰五十年只欠一死經此世變義無再辱云云並屬予代呈封章疏入天子覽奏隕涕初五日詔曰南書房行走五品銜王國維學問博通躬行廉謹由諸生經朕特加拔擢供職南齋因值播遷留京講學尙不時來津召對依戀出於至誠遽覽遺章竟自沈淵而逝孤忠耿耿深惻朕懷著加恩予諡忠愍派貝子溥忻即日前往奠醢賞給陀羅經被並賞銀二千圓治喪由留京辦事處發給以示朕憫惜貞臣之至意其哀榮爲二百餘年所未有海內外人士知與不知莫不悼惜公至是可謂不負所學矣予旣入都哭公並經紀其身後遺著盈尺將以一歲之力爲之任編訂此雖在公爲羽毛公之不朽固在彼不在此然固後死者之責矣公生於光緒丁丑十月二十九日卒於丁卯五月三日得年五十有一娶莫氏繼室潘氏子潛明高明貞明紀明慈明登明孫慶端潛明予子婿也先公一年卒秋七月十七日其嗣子將遵遺命卜葬於清華園側海內外人士以予交公久知公深多就予訪公學行乃揮涕爲之傳俟異日史官採焉

論曰公平生與人交簡默不露圭角自待顧甚高方爲汪舍人
司書記第日記門客及書翰往來而已故抑鬱不自聊及與予
交爲謀甘旨俾成學遂無憂生之嗟在他人必感知矣而公顧
落落意若曰此惠我耳非知我也及陳善納誨以守先待後相
勉一旦乃欲北面意殆曰此真知我矣其所以報之者乃在植
節立行不負所學斯不負故人賢者之所爲固與世俗之感惠
徇知者異矣又公之一生予知公雖久而素庵相國知之尤深
相國性嚴正少許可嘗主予家一見公遽相推許後遂加薦剡
公感知遇執贄門下及相國聞公死耗泣然曰士夫不可不讀
書然要在守先聖經訓耳非詞章記誦之謂也嘗見世之號博
雅者每貴文賤行臨難巧辭以自免今靜安學博而守約執德
不回此予所以重之也嗚呼相國真知人哉

王忠愍公別傳

羅振玉

公旣安窀穸予乃董理公之遺著求公疏稿於其家則公已手
自焚燬幸予篋中藏公論政學疏艸蓋削稿後就予商榷者今
錄其大要於此其言曰臣竊觀自三代至於近世道出於一而

已泰西通商以後西學西政之書輸入中國於是修身齊家治國平天下之道乃出於二光緒中葉新說漸勝逮辛亥之變而中國之政治學術幾全爲新說所統一矣然國之老成民之多數尙篤守舊說新舊之爭更數十年而未有已國是淆亂無所適從臣愚以爲新舊不足論論事之是非而已是非之標準安在曰在利害利害之標準安在曰在其大小新舊之利害雖未可遽決然其大概可得言焉原西說之所以風靡一世者以其國家之富強也然自歐戰以後歐洲諸強國情見勢絀道德墮落本業衰微貨幣低降物價騰涌工資之爭鬥日烈危險之思想日多甚者如俄羅斯赤地數萬里餓死千萬人生民以來未有此酷而中國此十二年中紀綱掃地爭奪相仍財政窮蹙國幾不國者其源亦半出於此臣嘗求其故蓋有二焉西人以權利爲天賦以富強爲國是以競爭爲當然以進取爲能事是故挾其奇技淫巧以肆其豪強兼并更無知止知足之心浸成不奪不鬻之勢於是國與國相爭上與下相爭貧與富相爭凡昔之所以致富強者今適爲其自斃之具此皆由貪之一字誤之

此西說之害根於心術者一也中國立說首貴用中孔子稱過猶不及孟子惡舉一廢百西人之說大率過而失其中執一而忘其餘者也試以最淺顯者言之國以民爲本中外一也先王知民之不能自治也故立君以治之君不能獨治也故設官以佐之而又慮君與官吏之病民也故立法以防制之以此治民是亦可矣西人以是爲不足於是有立憲焉有共和焉然試問立憲共和之國其政治果出於多數國民之公意乎抑出於少數黨之人意乎民之不能自治無中外一也所異者以黨魁代君主且多一賄賂奔走之弊而已孔子言患不均大學言平天下古之爲政未有不以均平爲務者然其道不外重農抑末禁止兼并而已井田之法口分之制皆屢試而不能行或行而不能久西人則以是爲不足於是有社會主義焉有共產主義焉然此均產之事將使國人共均之乎抑委託少數人使均之乎均產以後將合全國之人而管理之乎抑委託少數人使代理之乎由前之說則萬萬無此理由後之說則不均之事俄頃即見矣俄人行之伏尸千萬赤地萬里而卒不能不承認私產之

制度則曩之洵洵又奚爲也臣不敢謂西人之智大率類此然此其章章者矣臣觀西人處事皆欲以科學之法馭之夫科學之所能馭者空間也時間也物質也人類與動植物之軀體也然其結構愈複雜則科學之律令愈不確實至於人心之靈及人類所構成之社會國家則有民族之特性數千年之歷史與其周圍之一切境遇萬不能以科學之法治之而西人往往見其一而忘其他故其道方而不能圓往而不知反此西說之弊根於方法者二也至西洋近百年中自然科學與歷史科學之進步誠爲深邃精密然不過少數學問家用以研究物理考證事實琢磨心思消遣歲月斯可矣而自然科學之應用又不勝其弊西人兼并之烈與工資之爭皆由科學爲之羽翼其無流弊如史地諸學者亦猶富人之華服大家之古玩可以飾觀瞻而不足以養口體是以歐戰以後彼土有識之士乃轉而崇拜東方之學術非徒研究之又信奉之數年以來歐洲諸大學議設東方學講座者以數十計德人之奉孔子老子說者至各成一團體蓋與民休息之術莫尙於黃老而長治久安之道莫備

觀堂集林